

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԸՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ժ. Տարի, Թիւ 439, Ուրբաթ, 01 ՅՈՒՆԻՍ, 2018

ՀԱՄԱՅՆՔԱՅԻՆ

Մայիսեան 100 Ամեայ Հերոսամարտին Նուիրուած Երեկոյ

Արեան գնով կերտուած անկախ պետականութիւնը արին, քրտինքով ու հաւաքական ճիգով միայն կը հաստատուի:

Արդարեւ Մայիսեան յաղթանակը սովորական տօն մը չէ եւ չի կրնար ըլլալ, որովհետեւ



բնաչնչման եզրին կանգնած ազգ մը ներշնչելով եւ սպարազինուելով իր պապերուն թողած մշակութային հաստատ ժառանգով եւ խիզախութեամբ ու բարձր կորովով կրցաւ դէմ դնել այնպիսի թշնամիի մը, որուն աւերագործման ու վայրագութեան տենչերը սահման չունին:

Այս պատուաբեր առիթով, Ուրբաթ, 25 Մայիս 2018-ին երեկոյեան ժամը 7:00-ին տեղի ունեցաւ Սրբոց Վարդանանց Եկեղեցոյ սրահէն ներս յատուկ երեկոյ մը նուիրուած Հայաստանի Ա. Հանրապետութեան ծննդեան 100 ամեակին, հովանաւորութեամբ Թեմիս Բարեջան Առաջնորդ Գերշ. Տ. Մասիս Եպս. Զօպույեանին եւ կազմակերպութեամբ Քուէյթի Ազգային Վարչութեան:

Հնչելէ ետք ՀՀ. օրհներգը, Ողջոյնի խօսքով ելոյթ ունեցաւ Ազգային վարժարանի փոխ տնօրէն՝ Պրն. Կարօ Արսլանեանը, որ իր խօսքին մէջ ըսաւ.- «եկէ՛ք, խոր յարգանքով խոնարհինք Մարդարապատը կերտողներու սրբազան շիրիմներուն առջեւ եւ բարձր գիտակցութեամբ գրկենք եւ մեր մէջ տանինք անոնց կտակը, իրար կողք կողքի կանգնած

աւելի ամուր, աւելի հաստատ եւ աւելի հանդուրժողութեամբ, որովհետեւ պատմութեան մեր բոլոր լուսաւոր էջերը մենք արձանագրած ենք հաւաքական ճիգերով, հաւաքական քրտինքով ու հաւաքական արիւնով»:

Ապա իր սրտի խօսքը փոխանցեց Քուէթի մօտ ՀՀ. դեսպան Պրն. Մանուէլ Բաղէեանը: Պրն. Դեսպանը շնորհաւորել է ետք ներկաները շեշտեց թէ «Սարգսապատի ճակատամարտը հայ ժողովրդի փայլուն էջերից է: 1918 Մայիս 28-ին վերականգնուեցաւ հայկական պետականութիւնը, հռչակուեց Հայաստանի Ա. Հանրապետութիւնը»: Ապա գործադրուեցաւ գեղարուեստական ճոխ յայտագիր, որուն ընթացքին էլոյթ ունեցան Ռէժինա Հինտոյեանը «Տուն իմ Հայրենի» եւ Ժան Փօլ Մուշեղեանը «Է՛ Ոտքի Հայ Ժողովուրդ» երգերով:

Անդրանիկ Ծառուկեանի «Թուղթ Առ Երեւան» գործէն հատուածներ ասմունքեց՝ Տիկ. Նարինէ Արապաթլեանը, իսկ ազգային վարժարանէն խումբ մը պարմանուիներ ղեկավարութեամբ՝ Տիկ. Ժաննա Մերոբեանին ներկաներուն հրամցուցին փունջ մը հայրենասիրական երգեր դաշնամուրի ընկերակցութեամբ՝ Տիկ. Հայկուհի Բազեանի: Օրուան բանախօսն էր ՀՅԴ Գ.Մարմնի անդամ Պրն. Արթիւր Եղիազարեանը, որ իր հարուստ մեկնաբանութիւններով կամրջեց օրուան պատգամը Հայաստանեան ներկայ իրավիճակին հետ, ան յատկապէս անդրադարձաւ Հայաստանի քաղաքական վերջին անցուդարձներուն մասին եւ շեշտեց, որ այսօր Հայաստանի մէջ կը տիրէ նոր իրավիճակ, որուն յաջողութեան համար բոլորս պատասխանատու ենք համահաւասար:

Բանախօսի էլոյթին աւարտին լուսաբանական հարցերու առիթ տրուեցաւ: Յարգարժան հիւրը մանրամասնօրէն պատասխանեց ամէն հարցերուն:

Փակման խօսքը արտասանեց եւ իր պատգամը փոխանցեց Թեմիս Առաջնորդը որ ըսաւ.- «28 Մայիս 1918-ին հայութիւնը կրցաւ փշրել ստրկութեան շղթան, թօթափել սրտկութեան զգացումը եւ կերտել իսկական յաղթանակ, որուն խորհուրդը փոխանցուած է սերունդէ սերունդ եւ պիտի շարունակէ ներշնչման աղբիւր հանդիսանալ»:

ԼԻԲԱՆԱՆԻ ԴԵՍՊԱՆԱՏԱՆ ՌԱՄԱՏԱՆԵԱՆ ԵՐԵԿՈՆ

Չորեքշաբթի, 30 Մայիս 2018ին, Գերշ. Տէր Մասիս Եպիսկոպոս Զօպուեան՝ ընկերակցութեամբ եկեղեցոյս հոգեւոր հովիւ՝ Արժ. Տէր Արտակ Ա. Քհնյ. Քէհեաեանի, մասնակցեցաւ Լիբանանի Դեսպանատան կազմակերպած Ռամատանեան երեկոյին: Ներկայ էին բարեկամ դեսպաններ, քոյր եկեղեցիներու առաջնորդներ եւ հոգեւոր հայրեր, իսկամ զանազան համայնքներ ներկայացնող կրօնականներ եւ մեծ թիւով հրաւիրեալներ:

Պատրաստուած էր Լիբանանի աւանդական բարքերու եւ սովորութիւններու ծանօթացման յատուկ գեղարուեստական էլոյթներ, որոնք ներկաները պահեցին հին աւանդական ռամատանեան գիշերներու մթնոլորտին մէջ: Ներկաները՝ իսկամ թէ քրիստոնէայ, սիրոյ ջերմ զգացումներ փոխանակեցին յուսալով, որ ամենաբարին Աստուած բոլորին կը շնորհէ բարօր օրեր:

ՄԱՐՈՆԻԹ ԵԿԵՂԵՑԻՈՅ ՊԱՏՈՒԻՐԱԿՈՒԹԻՒՆԸ Կ'ԱՅՑԵԼԷ ՍՐԲԱԶԱՆ ՀՕՐ

Երկուշաբթի, 28 Մայիս 2018ի երեկոյեան ժամը 5:30ին, Մարոնիթ եկեղեցւոյ Հոգեւոր հովիւ՝ Հոգշ. Տէր Ռիմոն Վրդ. Իյտի գլխաւորութեամբ պատուիրակութիւն մը, Առաջնորդարան այցելեցին, Թեմիս Առաջնորդ Գերշ. Տէր Մասիս Եպս. Զօպուեանի եպիսկոպոսական ձեռնադրութեան եւ օծման շնորհաւորական մաղթանքներ փոխանցելու համար:

Գերաշնորհ սրբազան հայրը՝ Արժ. Տէր Արտակ Ա. Քհյ. Քէհեաեանի, Ազգային Վարչութեան ատենապետ՝ Պրն. Մունիր Դարբինեանի եւ Տք. Յակոբ Սերայտարեանի հետ, դիմաւորեց քոյր եկեղեցւոյ պատուարժան պատուիրակութեան անդամները:

Սրբազան հայրը, հիւրերու եպիսկոպոսական ձեռնադրութեան եւ օծման բարեմաղթութիւնները եւ հայ եկեղեցւոյ սեփական կալուածի տէր դառնալու քաջ որոշումի շնորհաւորական խօսքերը լսելէ ետք, շնորհակալութիւն յայտնեց իրենց ազնիւ վերաբերմունքին համար, ամփոփ ձեռով ներկայացուց Հայ եկեղեցին, ապա պատասխանեց անոնց զանազան հարցումներուն, որ ընդհանրապէս հայ եկեղեցւոյ պատմութեան եւ սովորութիւններուն կը վերաբերէր:

Աւարտին անոնք շրջեցան նաեւ եկեղեցւոյ մէջ, ուր ստացան նաեւ կարգ մը եկեղեցւոյ վերաբերեալ հարցերու պատասխաններ: Ապա յիշատակի նկարներ ունեցան այս սիրալիր այցելութենէն:



ՀԱՅԿԱԿԱՆ

ՀՅԴ-ն Միական է



ՀՅԴ Բիւրոյին հրաւերով Մայիս 29-ին Երեւանի մէջ գումարուեցաւ ՀՅԴ Հայաստանի եւ սփիւռքի կազմակերպութիւններու ղեկավար մարմիններու խորհրդակցական ժողովը:

Նոր իրողութիւններու լոյսին տակ ժողովը հանգամանալից քննարկման առարկայ դարձուց Հայաստանի ներքաղաքական իրավիճակը, կուսակցութեան վերջին երկամսեայ գործունէութիւնը, ինչպէս նաեւ անդրադարձ կատարեց հնարաւոր քաղաքական զարգացումներուն եւ յառաջիկայ կատարելիքներուն:

Ժողովը վերահաստատեց հայաստանակեդրոն գործունէութեան նոր թափ հաղորդելու՝ կուսակցութեան յանձնառութիւնը եւ իր ամբողջական զօրակցութիւնը յայտնեց ժողովրդական շարժման յաղթանակին մէջ կուսակցութեան մարմիններուն

կողմէ որդեգրուած քաղաքական ուղեգծին:

Ժողովը արձանագրեց, որ հայոց պետականութեան հզօրացումն ու ամրապնդումը կը մնան համահայկական հիմնական օրակարգ եւ գերխնդիր թէ՛ հայրենաբնակ ժողովուրդին եւ թէ՛ սփիւռքահայութեան համար:

Ժողովը արժեւորեց համաժողովրդական շարժման իբրեւ արդիւնք տեղի ունեցած վերազարթօնքը՝ այն համոզումով, որ հայոց պետականութեան վերականգնման 100-ամեակին ընդառաջ անիկա իրապէս կ'իմաստաւորուի, եւ կ'ունենանք նոր սկիզբ, արդար եւ հզօր Հայաստան:

ՀԱՅ ՅԵՂԱՓՈԽԱԿԱՆ ԴԱՇՆԱԿՑՈՒԹԻՒՆ

30 Մայիս 2018

**Նախագահ Սարգսեան-Եւրոպական Միութեան Յատուկ
Ներկայացուցիչ Հանդիպում**

Հայաստանի նախագահ Արմէն Սարգսեան 30 Մայիսին ընդունած է Հարաւային Կովկասի մէջ եւ Վրաստանի ճգնաժամի հարցերու Եւրոպական Միութեան յատուկ ներկայացուցիչ Թոյուօ Քլաարը:

Նախագահ Սարգսեան կարելոր նկատած է Եւրոպական Միութեան հետ յարաբերութիւններու շարունակական զարգացումն ու կառուցողական երկխօսութիւնը՝ հաստատելով, որ Համապարփակ եւ ընդլայնուած գործընկերութեան համաձայնագիրը փոխգործակցութեան նոր կարելիութիւններ կը ստեղծէ:

Զրուցակիցները միտքեր փոխանակած են արցախեան տագնապի լուծման ընթացքին վերաբերեալ: Նախագահը ըսած է, որ Հայաստան հաւատարիմ է ԵԱՀԿ Մինսքի խումբի համանախագահներուն միջնորդութեամբ իրականացուող բանակցային գործընթացին եւ յանձնառու է շարունակելու ջանքերը՝ տագնապի խաղաղ լուծման հասնելու առաջադրանքով:

Վարչապետ Փաշինեան Վրաստանի Մէջ Հանդիպումներ Ունեցաւ Բարձրաստիճան Անձնաւորութիւններու Հետ

Պաշտօնական այցելութեամբ Վրաստան գտնուող Հայաստանի վարչապետ Նիկոլ Փաշինեան 30 Մայիսին հանդիպումներ ունեցաւ Վրաստանի նախագահին, վարչապետին, խորհրդարանի նախագահին, ինչպէս նաեւ վրացահայ համայնքի ներկայացուցիչներուն հետ:

Վրաստանի նախագահ Գիորկի Սարկվելաշվիլի ողջունելով Հայաստանի վարչապետը՝ բարձր գնահատեց երկու երկիրներու կառավարութիւններու միջեւ տեղի ունեցած հանդիպման արդիւնքները եւ նշեց, որ քննարկուած հարցերն ու նախաձեռնութիւնները խթան պիտի հանդիսանան յարաբերութիւններու հետագայ զարգացման ու ամրապնդման: «Ուրախ եմ հանդիպելով Հայաստանի ժողովրդավար վարչապետին: Յոյս ունիմ, որ ձեր այցելութիւնը նոր երանգ պիտի հաղորդէ հայ-վրացական յարաբերութիւններուն, որոնք ունին բազմադարեայ պատմութիւն», ըսաւ Վրաստանի նախագահը:

Նիկոլ Փաշինեան նշեց, որ ուրախ է նախագահ Սարկվելաշվիլիին հանդիպելու եւ երկու երկիրներու յարաբերութիւններու հետագայ խորացման ու զարգացման հեռանկարները քննարկելու կարելիութեան համար: «Համոզուած եմ, որ ժողովրդավարութիւնը մեր երկիրներուն համար ունի կենսական նշանակութիւն: Մեր ժողովուրդներու համոզումը՝ երկկողմանի յարաբերութիւններու մէջ, հիմնուած է սիրոյ եւ համերաշխութեան վրայ, եւ մենք ջանքեր պիտի չխնայենք անոնց նոր թափ հաղորդելու համար», ըսաւ Փաշինեան՝ համոզում յայտնելով, որ հանդիպման ընթացքին կարենան ուրուագծել միջպետական համագործակցութեան զարգացման նոր կարելիութիւններ:

Անկէ ետք կայացաւ ընդլայնուած կազմով հանդիպումը, որուն ընթացքին Վրաստանի վարչապետը ընդգծեց, որ իր կառավարութիւնը պատրաստ է քայլերու ձեռնարկել՝ ընդլայնելու երկու երկիրներու յարաբերութիւնները տարբեր ոլորտներու մէջ եւ նոր ազդակ հաղորդել հայ-վրացական կապերուն:

Նիկոլ Փաշինեան հաստատեց, որ Հայաստանն ու Վրաստանը պատմական խոր արմատներ ունին, ուստի ան որոշած է իր առաջին այցելութիւններուն կարգին նկատի ունենալ այս երկիրը: «Կը հաւատամ, որ մեր երկու երկիրներուն ու ժողովուրդներուն միջեւ գոյութիւն ունեցող ջերմ յարաբերութիւններով պայմանաւորուած միջպետական երկխօսութիւնը ամուր հիմք պիտի ստեղծէ մեր համագործակցութեան առաւել ամրապնդման համար», շեշտեց ան: Վարչապետը

աւելցուց, որ Վրաստանի հետ յարաբերութիւններու վերընթաց զարգացումը կը շարունակէ մնալ Հայաստանի արտաքին քաղաքական առաջնահերթութիւններու շարքին՝ վստահեցնելով, որ Հայաստանի նոր կառավարութիւնը հետաքրքրուած է կարելին ընելու՝ Վրաստանի հետ հարուստ փոխգործակցութեան նոր որակ հաղորդելու համար:

Վարչապետ Փաշինեան հանդիպում ունեցաւ նաեւ Վրաստանի խորհրդարանի նախագահ Իրազլի Գոպախիցէի հետ, որ կարելի էր նկատեց երկու երկիրներու կառավարութիւններուն եւ խորհրդարաններուն միջեւ աշխուժ համագործակցութիւնը եւ ընդգծած, որ այս մէկը պիտի նպաստէ հայ ու վրացի ժողովուրդներու կապերու աւելի եւս ամրապնդման ու ընդլայնման: Նիկոլ Փաշինեան ընդգծեց, որ երկու երկիրներուն յարաբերութեան մէջ կարելի տեղ ունի միջխորհրդարանական երկխօսութիւնը: Զրուցակիցները համոզուի յայտնեցին, որ Հայաստանի եւ Վրաստանի խորհրդարանականներուն պարբերական հանդիպումները իրենց ներդրումը ունին երկու երկիրներուն միջեւ բարիդրացիական յարաբերութիւններու զարգացման մէջ: Անոնք շեշտեցին, որ երկխօսութեան միջոցով Հայաստանն ու Վրաստանը ի վիճակի են արագօրէն լուծելու բոլոր հարցերը, գտնելու գործընկերութեան նոր ձեւաչափեր եւ փոխշահաւէտ միացեալ նախագիծերու ու ծրագիրներու իրականացման նոր կարելիութիւններ:

Վարչապետ Նիկոլ Փաշինեան աւելի ուշ այցելեց նաեւ Խոջավանք պանթէոն, ուր ծաղիկներ զետեղեց Բաֆֆիի, Յովհաննէս Թումանեանի եւ Գաբրիէլ Սունդուկեանի շիրիմներուն վրայ՝ իբրեւ յարգանք այդ մեծերուն յիշատակին: Այնուհետեւ ան ուղղուեցաւ Թիֆլիսի Ս. Գեորգ եկեղեցի, ուր դիմաւորուեցաւ հոգեւորականներուն եւ ժողովուրդին կողմէ: Հոն եւս ան ծաղիկներ զետեղեց բակին մէջ գտնուող Սայաթ Նովայի շիրիմին վրայ: Ապա ան սրտի խօսք արտասանելով ըսաւ, որ հպարտ է վիրահայութեամբ, հայ մնալու անոնց պայքարով՝ աւելցնելով, որ Հայաստանի եւ Վրաստանի դրական յարաբերութիւնները կարելիութիւն կը ստեղծեն Վրաստանի մէջ հայերուն՝ ապրուստի աւելի լաւ պայմաններու ստեղծումին, ինչպէս նաեւ վրացիներուն կողմէ Հայաստանի նկատմամբ հանգիստ վերաբերումին:

Արտաքին Գործոց, Պաշտպանութեան, Մշակոյթի Փոխնախարարներու Նշանակում

Հայաստանի վարչապետ Նիկոլ Փաշինեանի հրամանով կատարուած են բարձրաստիճան պաշտօնեաներու նշանակումներ: Այսպէս, Գաբրիէլ Բալայեանը եւ Մակար Ղամբարեանը նշանակուած են պաշտպանութեան նախարարի տեղակալներ, Ռուբէն Ռուբինեանը նշանակուած է արտաքին գործոց նախարարի տեղակալ, Նազէնի Ղարիբեանը՝ մշակոյթի նախարարի տեղակալ: Ալբերտ Արգարեանը, Տիգրան Ուլիխանեանը եւ Հայկ Սարգսեանը նշանակուած են պետական վերահսկողական ծառայութեան պետի տեղակալներ:

Վարչապետին հրամանով Իշխան Կարապետեան ազատ կացուցուած է Հայաստանի Հանրապետութեան գիւղատնտեսութեան նախարարութեան սննդամթերքի անվտանգութեան պետական ծառայութեան պետի պաշտօնէն՝ իր դիմումին համաձայն, Էնրիկօ Ապրիամովը զերծ կացուցուած է Հայաստանի արտակարգ իրավիճակներու նախարարի տեղակալի պաշտօնակատարի պաշտօնէն՝ իր դիմումին համաձայն:

www.tert.am

Կիրո Մանոյեան. «Ջաւախքը Պետք է Դառնայ Հայ-Վրացական Յարաբերութիւններու Ամէնէն Ուժեղ Օղակը»

ՀՅԴ Բիւրոյի հրաւերով գումարուած ՀՅԴ աշխարհասփիւռ բոլոր կառոյցներու ներկայացուցիչներու խորհրդակցական ժողովին մասին «Երկիր»-ին հետ ունեցած զրոյցին ընթացքին ՀՅԴ Բիւրոյի անդամ, ՀՅԴ Բիւրոյի Հայ դատի եւ քաղաքական հարցերու գրասենեակի պատասխանատու Կիրո Մանոյեան ըսաւ, որ Հայաստանի վերջին իրադարձութիւններուն եւ Հայաստանի Հանրապետութեան հիմնադրութեան 100-ամեակին առիթներով նման ժողով գումարելու հնարաւորութիւն ստեղծուեցաւ:

«Ժողովը լսեց զեկոյցներ Դաշնակցութեան Հայաստանի Գերագոյն մարմինի, Դաշնակցութեան Բիւրոյի վարած քաղաքականութեան մասին, յատկապէս վերջին իրադարձութիւններու հետ կապուած, եղան քննարկումներ: Մասնակիցները արտայայտեցին իրենց առաջարկներն ու տեսակէտները: Եզրակացութիւնն այն էր, որ բնականաբար կուսակցութիւնը շարունակելու է հայաստանակեդրոն իր քաղաքականութիւնը, որ անհրաժեշտ է թէ՛ Հայաստանին ու ժողովուրդին, եւ թէ՛ ընդհանրապէս սփիւռքահայութեան համար: Այս ամէնը վերահաստատեցին կուսակցութեան միակամութիւնը այս հարցով եւ շեշտեցին, որ շարժման յաջողութեան համար կուսակցութեան վարած քաղաքականութիւնը եղած է ճիշդ եւ ողջունելի», մանրամասնեց Մանոյեան:

Նշենք, որ ՀՅԴ-ն կազմակերպած էր նաեւ բարեսիրական ճաշկերոյթ, որուն հասոյթը պիտի տրամադրուի Ջաւախքին: Ճաշկերոյթին ժամանակ նաեւ կատարուեցաւ հանգանակութիւն, տարբեր երկիրներէն դաշնակցականներ գումարներ գոյացուցին Ջաւախքի խնդիրներու լուծման համար:

Անդրադառնալով վարչապետ Փաշինեանի Ջաւախք կատարած այցելութեան՝ Մանոյեան նշեց, որ չի յիշեր պարագայ մը, երբ վերջին 15 տարուան ընթացքին Հայաստանի քաղաքական ամէնէն ուժեղ լիազօրութիւնները ունեցող անձ մը այցելէ Ջաւախք: Ան արձանագրեց, որ նոյնիսկ եղած են արտաքին գործոց նախարարներ, որոնք չեն այցելած Ջաւախք: «Մեր իշխանութիւններուն կողմէ չէ եղած այն դրսեւորումը, որ իսկապէս կարելոր կը նկատեն Ջաւախքը իբրեւ Հայաստան-Վրաստան յարաբերութիւններու՝ վերջին 27 տարիներուն ամենաթոյլ, բայց արդէն անհրաժեշտ, կենսական թիրախը, որ պետք է ըլլայ ամէնէն ուժեղ օղակը», ըսաւ ան:

Ան յոյս յայտնեց, որ վարչապետին այս այցելութիւնը կը ծառայէ այդ նպատակին: «Հիմա Հայաստանի իշխանութիւններուն կողմէ նման վերաբերմունքի կ'արժանանայ Ջաւախքը, ջաւախահայութիւնը, Ջաւախքի հարցերը, բայց նաեւ Վրաստանի իշխանութիւնները կը տեսնեն, կը հասկնան, որ իսկապէս անհրաժեշտ է Ջաւախքի խնդիրները լուծել, որպէսզի Ջաւախքը դառնայ հայ-վրացական յարաբերութիւններու ամէնէն զօրեղ օղակը, որովհետեւ իսկապէս Հայաստան-Վրաստան յարաբերութիւնները իւրայատուկ են իրենց բնոյթով: Պետք է հասկնանք, որ հայ-վրացական յարաբերութիւնները երկու ժողովուրդներու համար ալ ունին կենսական նշանակութիւն եւ անհրաժեշտ է գուրգուրալ ու աւելի սերտացնել այդ յարաբերութիւնները, որոնց համար ալ անհրաժեշտ է Ջաւախքի խնդիրներու կարգաւորումը, որպէսզի մենք չունենանք այնպիսի վտանգներ, որոնք կրնան սպառնալ երկու պետութիւններու յարաբերութիւններուն», շեշտեց ան:

ՄԻՋԱԶԳԱՅԻՆ

Լաւրով. «Ոչ Սուրիական Բոլոր Ուժերը Պէտք Է Անմիջապէս Հեռանան Երկրի Հարաւ Արեւմուտքը Լարուածութեան Մեղմացման Գօտիէն»

Ռուսիոյ արտաքին գործոց նախարար Մերկել Լաւրով Չորեքշաբթի օր յայտնեց, որ բոլոր օտար զինեալ խմբաւորումները պէտք է հեռանան Սուրիոյ հարաւ արեւմտեան շրջանը գտնուող լարուածութեան մեղմացման գօտիէն՝ աւելցնելով, որ իր երկիրը այդ գծով երկխօսութիւն կը կատարէ Միացեալ Նահանգներու եւ Յորդանանի հետ:

«Հարաւ արեւմուտքի լարուածութեան մեղմացման գօտիին շուրջ շատ ծանօթ համաձայնութիւններ ունինք Ռուսիոյ եւ Յորդանանի հետ, եւ Իսրայէլ անկէ լաւապէս տեղեակ է: Ըստ այդ համաձայնութիւններուն, այդ լարուածութեան մեղմացման գօտին պէտք է ամրապնդուի եւ ոչ սուրիական բոլոր ուժերը պէտք է դուրս գան հոնկէ», ըսաւ Լաւրով:

«Կը կարծեմ, թէ այդ մէկը պէտք է տեղի ունենայ կարելի եղածին չափ շուտ, եւ այժմ կը կատարենք այդ մէկը՝ ներառեալ յորդանանցի եւ ամերիկացի պաշտօնատարներու հետ գործակցութիւնը», աւելցուց ան:

Լաւրով ըսաւ, որ իրենք պատրաստ են Միացեալ Նահանգներու հետ յարաբերութիւններու բնականոնացման «եւ փոխարէնը Ուաշինկթընէն առաջարկներ կը սպասենք»: Ան Ուաշինկթընին կոչ ուղղեց՝ Թեհրանի հետ երկխօսութիւն կատարելու:

Լաւրով Այսօր Հիւսիսային Քորէա Կ'այցելէ



Ռուսիոյ արտաքին գործոց նախարար Մերկել Լաւրով այսօր պիտի այցելէ Հիւսիսային Քորէա՝ քննարկելու համար թերակղզիին վրայ տիրող կացութիւնը:

«Ռաշա Թուտէյ» կը հաղորդէ, որ ռուսական դիւանագիտութեան պետը Փիոնկիանկի մէջ հանդիպում պիտի ունենայ հիւսիսային քորէացի իր պաշտօնակից Ռի Եոն Հոյի հետ եւ անոր հետ պիտի քննարկէ երկկողմանի յարաբերութիւններն ու միջազգային հարցերը:

Աղբիւրը կը յիշեցնէ, որ ապրիլին Հիւսիսային Քորէայի արտաքին գործոց նախարարը այցելած էր Մոսկուա, ուր հանդիպում ունեցած էր Լաւրովի հետ եւ զինք հրաւիրած Փիոնկիանկ:

Նշենք, որ Մինկափուրի մէջ կ'ընթանան Միացեալ Նահանգներու նախագահ Տանըլտ Թրամփի եւ Հիւսիսային Քորէայի ղեկավար Քիմ Չեն Ընի պատմական հանդիպումին նախապատրաստական աշխատանքները:

«Մընպեժի Հարցին Գծով Թուրքիոյ Հետ Տակաւին Որեւէ Համաձայնութիւն Չենք Գոյացուցած» Կ'ըսէ Նոուրթը

Միացեալ Նահանգներու արտաքին գործոց նախարարութեան մամլոյ բանբեր Հետըր Նոուրթը մամլոյ ասուլիսի ընթացքին յայտարարած է, որ Մընպեժի մէջ կատարուելիք գործողութիւններուն շուրջ Միացեալ Նահանգներու եւ Թուրքիոյ միջեւ տակաւին որեւէ համաձայնութիւն չէ գոյացած՝ աւելցնելով, որ քննարկումները կը շարունակուին:

Ան հաստատած է, որ թուրք-ամերիկեան աշխատանքային խումբը Սուրիոյ մէջ միասնական գործողութիւններու նախնական քարտէս կազմած է արդէն, եւ որ Մընպեժը եւս կը գտնուի զծուած տարածքներուն մէջ:

Թուրքիոյ արտաքին գործոց նախարար Մելուք Չաուշօղլու Չորեքշաբթի օր յայտարարեց. «Մընպեժի վերաբերեալ ճամբու քարտէսը կրնայ գործադրուիլ ամբարն աւարտէն առաջ, եթէ Ամերիկայի հետ համաձայնութիւն գոյացնենք»:

Թրքական «Տիքէն» կայքը նախապէս հաղորդած էր, որ Թուրքիոյ արտաքին գործոց նախարարութիւնն ու Անգարայի մէջ Միացեալ Նահանգներու դեսպանատունը միացեալ հաղորդագրութիւն մը հրապարակելով յայտարարեցին, թէ Սուրիոյ հարցով թուրք-ամերիկեան աշխատանքային խմբակը սուրիական Մընպեժ քաղաքին մէջ Թուրքիոյ եւ Միացեալ Նահանգներու զինեալ ուժերու ընդհանուր գործողութիւններու «ճամբու քարտէս» մը մշակած է: «Կողմերը սահմանած են Մընպեժի մէջ անվտանգութեան ապահովման համար իրականացուող համագործակցութեան ճամբու քարտէսի մը ընդհանուր կէտերը», նշուած է հաղորդագրութեան մէջ: Ըստ հաղորդագրութեան, Թուրքիոյ արտաքին գործոց նախարար Մելուք Չաուշօղլու եւ Միացեալ Նահանգներու արտաքին գործոց նախարար Մայք Փոմփէօ իրենց հանդիպումին ընթացքին «նկատի պիտի ունենան» ուրբաթ օր Թուրքիոյ մէջ տեղի ունեցած ժողովին մասնակիցներուն «յանձնարարականները»:

Ուաշինկթըն Չ'ուզեր Թուրքիոյ Մէջ «Էֆ-35»-ներու Կողքին «Էս-400»-ներ Տեսնել


Միացեալ Նահանգներու օդուժի նախարար Հետըր Ուիլսըն՝ մեկնաբանելով Թուրքիոյ կողմէ ռուսական «Էս-400» հակաօդային հրթիռներու համակարգերու գնումը, յայտարարած է, որ իրենք չեն ուզեր այդ համակարգերը տեսնել ամերիկեան «Էֆ-35» հալածիչներու կողքին: Այս մասին կը հաղորդէ թրքական «Տիքէն» կայքը: Ամերիկացի նախարարը նշած է, որ իրենք այս գծով իրենց մտահոգութիւնները փոխանցած են Թուրքիոյ: «Մենք յոյսով ենք, որ Թուրքիան մինչեւ «Էֆ-35»-ներ ձեռք բերելը պիտի լուծէ այս հարցը», ըսած է Ուիլսըն:

Թուրքիոյ արտաքին գործոց նախարար Մելուք Չաուշօղլու Չորեքշաբթի օր յայտարարեց, որ եթէ Միացեալ Նահանգներ ի վերջոյ չմտակարարեն իրենց խոստացուած «Էֆ-35»-ները՝ «Թուրքիան զանոնք ձեռք պիտի բերէ այլ երկիրէ»:

«Եթէ օդանաւերը մեզի չյանձնուին, ապա մեր պահանջը կը բարարարենք այլ տեղէ», ըսաւ ան:

ԱԿՆԱՐԿ

Ի՞նչ Տօն Ենք Տօնում



Ակնյայտ է, որ որոշ մարդկանց համար այսօր էլ դեռ յստակ չէ, թե ինչի՞ն է նուիրում 100-ամեակի տօնը, որ համազգային շուքով տօնում ենք այս տարի: Մի՞թե այդպիսի տպաւորութիւն չի ստացել ցանկացած մարդ՝ ներկայ գտնուելով (եթէ յաջողուել է ներկայ գտնուել) Սարդարապատի տօնակատարութեանը: Ինքս առիթ ունեցայ տանը լինելու եւ հեռուստացոյց միացնելու, երբ հարիւրամեակի համերգին ինչ-որ երիտասարդ փորձում էր անգլերէն երգ երգել եւ, հասկանալով, որ այստեղ էլ բան չեմ կորցրել, փոխեցի ալիքը:

Ուզում եմ մէկ աւելորդ անգամ եւս արձանագրել, որ այս տարի լրանում է Հայոց պետականութեան վերականգնման 100-ամեակը: Յստակօրէն բանաձեւել է անհրաժեշտ, որ 2018 թուականը յրելեանն է երկուսուկէս տարի գոյատեւած անկախ պետականութեան հիմնադրման, որի հիմքի վրայ էլ, սկզբում գաղութացուած վիճակի մէջ, ապա կրկին անկախաբար, գոյութիւնն է շարունակում Հայոց Հանրապետութիւնը:

Ի՞նչ կապ ունի Բ. Աշխարհամարտի կցումը այս իրադարձութիւններին:

Այսօր արդէն բարձրաձայնուող փաստ է, որ առաջին հանրապետութիւնը կործանուեց ռուս-թուրքական գործարքի արդիւնքում: Փաստ է, որ Հայաստանի վրայ նոր թուրքական արշաւանքի ծանր օրերին Ռուսաստանը, ի դէմս Պորիս Լեկրանի, երկիրը յանձնելու վերջնագիր ներկայացրեց Հայաստանի կառավարութեանը, իսկ իշխանութեան խաղաղ փոխանցումից յետոյ, երեւի՝ որպէս երախտագիտութեան արտայայտութիւն, թուրքերին նուիրեց Հայաստանի Հանրապետութիւնից այդ պահին բռնագալթուած մօտ 40.000 քառ. քիլոմէթր տարածքը: Հիմա հարց. անկախութեան նուաճումը եւ արեւելահայութեանը թուրքական ցեղասպանութիւնից փրկելը խորհրդանշող Սարդարապատի յուշահամալիրում 100-ամեակի տարեդարձին ի՞նչ տրամաբանութեամբ են հնչում ռուսական երգն ու պարը:

Ասուածից չի հետեւում, թե հակառուսական ինչ-որ դրսեւորումներ լինէին մեզանում այս օրերին, բայց տեղի ունեցածի տրամաբանութիւնը ո՞րն է, մենք ի՞նչ տօն ենք տօնում:

Չեմ ցանկանում ընկնել նաեւ այլ ծայրայեղութեան մէջ եւ միտումնաւորութիւն տեսնել կատարուածի մէջ, եւ «ամենեցու» նկատմամբ սիրոյ զգացումով տոգորուած՝ եզրակացնում եմ, թե գործ ունենք պարզ անգիտութեան հետ: Ինչպէս որ անգիտութեան պէտք է վերագրել Հայաստանի պետականութիւնը եւ նրա կերտողներին փնտվող եւ կործանողներին գովերգող ֆիլմերի աւանդոյթի ուժով ցուցադրումը, տարբեր հեռուստաընկերութիւնների կողմից՝ 100-ամեակի առիթով: Առհասարակ ինչ-որ հարցերում անգէտ լինելու համար ոչ ոքու մեղադրել պէտք չէ, ոչ ոք ամենագէտ չէ, բայց ինչո՞ւ պէտք է որեւէ գործ մեզանում անեն նրանք, ովքեր տուեալ գործին հասու չեն: Շրջանառութեան մէջ դրուող գումարնե՞րն են որոշողը, թե՞ աւելի վեհ պատճառներ կան:

Ազգային ազատագրութեան շրջանի եւ առհասարակ հայրենասիրական բնոյթի մշակութային հսկայ ու հրաշալի ժառանգութիւն ունենք, արուեստագէտ կատարողների տաղանդաւոր սերունդ ունենք, որոնց ներկայութիւնը փափաքում են աշխարհի լաւագոյն բեմերը, մենք ինչո՞ւ ենք անում այն, ինչ անում ենք: Այստե՞ղ էլ հարցը հասնում է ձկան գլխին:

Այս տօնական օրերին նման տողեր թերեւս կարելի էր եւ չգրել, բայց եթէ չբարձրաձայնենք, վստահաբար երկրորդ հարիւրամեակում էլ չենք ձերբազատուելու խորհրդային բարքերի ու գաղափարախօսութեան կարօտաբաղձութեան մշուշից:



Հայոց պետականութեան հարիւրամեակի տօնակատարութիւնների, գիտաժողովների եւ զանազան այլ միջոցառումների գլխաւոր օգուտը կարծում եմ կը լինի այն, որ մեզանում տեղի ունենայ մտքի յեղափոխութիւն: Մենք անցեալին, ներկային, ապագային ու մեր արժէքներին պէտք է սովորենք նայել մեր ազգային աշտարակից: Օրէ օր համայնացող աշխարհում ամէն կողմից փչող գաղափարական, քաղաքական հոսանքներից մեր ազգային ինքնութիւնը կարող է պահպանել միայն ազգային արժեհամակարգը, գրահի վերածուած ազգային տարազը, որ պիտի խտացնի իր մէջ ե՛ւ պատմութիւնը ե՛ւ անանցելի շահերն ու տեսլականները ե՛ւ դարերով ամբարուած հոգեւոր ու մշակութային ժառանգութիւնը: Դրա համար մենք պէտք է վերադառնանք մեզ, մտածենք, արտայայտուենք, ապրենք հայերէն:

Այս առիթով պէտք է աւելացնել, որ մտքի յեղափոխութիւնը աւարտուած չէ: Թէպէտ տարին նշանաւորում է այլ կարեւոր իրադարձութիւններով, սրանց զուգահեռ, հարիւրամեակի ասելիքն ու շունչը հարկ է, որ հասցունեն մինչեւ տարեվերջ: Պատկերաւոր ասած՝ պէտք է տեղի ունենայ իրական ազգային ժառանգութեան փոխանցում նոր սերնդին: Յիշենք՝ դեռեւս տարեսկզբին ոմանք, գրեթէ լռութեան մէջ, քամահրանքով բարձրաձայնում էին Արամ Մանուկեանի վերաբերեալ իրենց անառողջ դատողութիւնները: Այսօր այլեւս Արամ Մանուկեանը բոլոր հայերինն է եւ աներկբայելի հեղինակութիւն: Գործընթացը պէտք է շարունակուի, իսկ դրա համար, փա՛ռք Աստծոյ, այս երկրում քիչ չեն համապատասխան պատրաստութեան տէր մարդիկ: Շումուններն էլ թող զբաղուեն իրենց շոուներով:

ԱՐՏԱՇԷՍ ՇԱՀԲԱԶԵԱՆ

www.aztagdaily.com

ԼՈՒՐԵՐ ԳԱՂՈՒԹՆԵՐԷՆ

Այցելություն Հալեպի Նահանգապետին

Ս. Քառասնից Մանկանց մայր եկեղեցույ վերաշինության ծիրին մեջ, Բերիոյ հայոց թեմի առաջնորդ Շահան արք. Սարգիսեանի գլխաւորութեամբ, ընկերակցութեամբ Ազգային վարչութեան անդամներ Յակոբ Հաճեանի, դոկտ. Հուրի Ազեգեանի, փաստաբան Նորա Գրաճեանի, Յովսէփ Գասապեանի, ծրագիրը իրագործող երկրաչափ Կարպիս Թովմասեանի եւ



երկրաչափ Մարալ Սեմերճեանի, 9 Մայիսին աշխատանքային այցելություն մը տրուեցաւ Հալեպի նահանգապետ Հուսէյն Ահմետ Տիպալի:

Սրբազան հայրը շնորհակալութիւն յայտնեց նահանգապետին կողմէ ցուցաբերուած աջակցութեան համար եւ անդրադարձաւ Բերիոյ հայոց թեմի վերաշինութեան ծրագիրին: Այդ ծիրին ներս, Ս. Քառասնից Մանկանց մայր եկեղեցույ վերաշինութեան իրագործման ընթացքին Հալեպի նահանգապետին հետ հարկ եղած գործակցութեան հաստատումէն մեկնելով՝ երկրաչափ Կարպիս Թովմասեանը ամփոփ կէտերու մէջ ներկայացուց ծրագիրը:

Հանդիպման ընթացքին Հալեպի նահանգապետը ամբողջական գործակցութեան իր պատրաստակամութիւնը յայտնեց՝ բարձրօրէն գնահատելով հայ համայնքի զաւակներուն կողմէ Սուրիոյ հանդէպ ցուցաբերուած սերն ու հաւատարմութիւնը եւ յաջողութիւն մատլթեց թեմի վերաշինութեան անյետաձգելի ծրագիրներուն:

Գահիրեի Մէջ Համազգայինի Հիմնադրութեան 90-ամեակի Նշում

6 Մայիսին Նիւ Եորքի «Հայ կեդրոն»-ին մէջ տեղի ունեցաւ Գահիրեի մէջ Համազգայինի հիմնադրութեան 90-ամեակի տօնակատարութիւնը:

Միութեան ատենապետ Հրանդ Մարգարեանը իր բացման խօսքին մէջ նկատել տուաւ, որ անցեալ տարի 4-7 Մայիսին քառօրեայ ծրագրով նշուեցաւ մասնաճիւղին յիսնամեակը, որուն ծրագիրը նուիրուած էր Արցախի պաշտպանողական դիրքերուն ծառայող զինուորներուն արեան հոսք կասեցնող սարքերու հայթայթման: Ձեռնարկներէն գոյացած 25 հազար ամերիկեան տոլարը ամբողջութեամբ յատկացուեցաւ այդ նպատակին: Ան ըսաւ, որ այս ձեռնարկով կը սկսի Համազգայինի հիմնադրութեան 90-ամեակի տօնակատարութեան տարին:



Մարգարեանը հրաւիրեց մասնաճիւղի փոխատենապետ Նայտա Ոսկերիչեանը, որ յայտագրին ընթացք տայ:

Օրուան բանախօս Սարո Նազարեանը սահիկներու ցուցադրութեամբ ներկայացուց Համազգայինի 90 տարուան պատմութիւնը՝ անցեալը, ներկան եւ յառաջիկայի ծրագիրները: Նազարեանը լայն տեղեկութիւններ տուաւ հիմնադիր անդամներէն՝ Լեւոն Շանթի, Նիկոլ Աղբալեանի եւ Համօ Օհանջանեանի մասին, ներկայացնելով դրուագներ անոնց կեանքէն, նաեւ անդրադարձաւ անոնց գործունէութեան:

Այնուհետեւ գործադրուեցաւ գեղարուեստական յայտագիր:

Երեկոյի եզրափակիչ խօսքը արտասանեց Ս. Լուսաւորիչ մայր եկեղեցւոյ հովիւ Մեսրոպ քինյ. Լազիսեանը, որ իր գոհունակութիւնն ու շնորհաւորանքները յայտնեց դասախօսին եւ միութեան ունեցած բոլոր ծրագրերուն:

Հայաստանի Ա. Հանրապետութեան 100-ամեակին Նուիրուած Ձեռնարկ

Հայաստանի Ա. Հանրապետութեան 100-ամեակին նուիրուած ձեռնարկներուն մեկնարկը սկսաւ ապրիլին՝ Ջիւան Միրզոյեանի անհատական ցուցահանդէտով եւ շարունակուեցաւ Սպանիոյ «Արարատ» միութեան կազմակերպութեամբ դերասաններ Հայկ եւ Գոհար Մարգիսեաններուն հեղինակած «Իմ տունը կամ անկախ ամէն ինչէ» կատակերգութեամբ, որուն առանցքային յորդորը հայրենիքը չլքելն ու զայն աւելի հզօրացնելն է: Դերասանները ժամանած էին Վալենսիա՝ կարեւորագոյն խորհուրդով. Հայաստան այլեւս ուրիշ է, աւելի բարեկեցիկ, օրինական եւ հիւրընկալ, որ անվերապահօրէն իր դռները բացած է աշխարհասփիւռ հայութեան առջեւ: Ներկայացման հերոսները՝ երկիրը լքելու ծանր որոշման

առջև կանգնած ամուսինները, վերջապես կ'որոշեն չերթալ եւ հոգ տանիլ նորածին թոռնիկին, որ նոր Հայաստանը ապագայ շենցնողը պիտի ըլլայ:

Հանդիսատեսներու շարքերուն մէջ կային նաեւ սպանացիներ, ներառեալ՝ Միսլաթայի քաղաքապետարանի մշակոյթի եւ արտաքին յարաբերութիւններու խորհրդականներ Պեպի Լուխա եւ Խոսէ Լուիս Կարսիա, որոնք կլանուած կը դիտէին օտարալեզու ներկայացումը ու գրեթէ կը հասկնային պանդխտութեան ուղին իր առջև ունեցող հայու հոգին:



Ֆրանսայի Մէջ Հայաստանի Նոր Նշանակուած Դեսպանը Ընդունեց Ֆրանսահայ Կազմակերպութիւններու Համակարգող Խորհուրդին Անդամները

17 Մայիսին Ֆրանսայի մէջ Հայաստանի նոր նշանակուած դեսպան Յամիկ Տոլմաճեանը ընդունեց Ֆրանսահայ կազմակերպութիւններու համակարգող խորհուրդին անդամները:

Տոլմաճեանը շնորհակալութիւն յայտնեց ֆրանսահայ համայնքի ներկայացուցիչներուն՝ Հայաստանի եւ Ֆրանսայի միջեւ հաստատուած առանձնաշնորհեալ յարաբերութիւններու ամրապնդման իրենց բերած շարունակական նպաստին համար եւ վստահութիւն յայտնեց, որ հետագային սերտ համագործակցութիւնը պիտի շարունակուի:



Խորհուրդի համանախագահներ Արա Թորանեանը եւ Մուրատ Փափագեանը խորհուրդի անդամներուն կողմէ շնորհաւորեցին եւ յաջողութիւն մաղթեցին նոր նշանակուած դեսպանին՝ վերահաստատելով իրենց պատրաստակամութիւնը շարունակելու աջակցութիւնը հայ-ֆրանսական դարաւոր բարեկամութեան ամրապնդման ուղղուած նախաձեռնութիւններուն:

www.aztarar.com

ԱՅԼԱԶԱՆ

Երեխայի «Առողջ» Ննջասենեակի Մը Նախապայմանները

Մանկաբուժ Մարի-Քլոտ Քլենթալի կարծիքով, երբ երեխան տարուան ընթացքին յաճախ կ'անհանգստանայ, քիթը կը հոսի, շունչի նեղություն կը զգայ, մորթային հարցեր կ'ունենայ, պետք է առաջին հերթին մտածել անոր ննջարանին պայմաններուն մասին: Շատ չոր կամ շատ խոնաւ մթնոլորտը, բարձր կամ ցած ջերմաստիճանը, փոշին եւ այլ ազդակներ վատառողջ կը դարձնեն փոքրիկին ննջարանը, ուր ան կ'անցընէ օրուան մէկ կարեւոր մասը: Կարդանք, թէ ի՛նչ կ'առաջարկէ Մարի-Քլոտ Քլենթալը ծնողներուն:

– Երեխային ննջասենեակին իտեալ ջերմաստիճանը 19-20 պէտք է ըլլայ, իսկ խոնաւութեան տոկոսը՝ 35-50 առ հարիւր:



– Սովորական աչքով անտեսանելի աքարիենները տեսակաւոր գերզգայնություններ կը պատճառեն. անոնք կ'ախորժին խոնաւ միջավայրէն եւ շուտով կը բազմանան՝ բոյն շինելով գորգերուն, ներքնակներուն, բարձերուն մէջ: Օրական 10-15 վայրկեան պատուհանը բանալով, սենեակին օդը փոխելով, արեւի ճառագայթներուն սենեակ թափանցելու առիթ տալով կարելի է 70 տոկոսով կասեցնել աքարիեններուն բազմացումը:

– Շարքաթական դրութեամբ թաց լաթով պէտք է մաքրել կահոյքին եւ խաղալիքներուն փոշին:

– Շարքաթական դրութեամբ ելեկտրական փոշեկուլով պէտք է մաքրել գորգը, մոքեթը, փարբէն:

– Սենեակին մէջ մէկ կամ երկու փրլիւշ (փափուկ խաղալիք) բաւարար են. չմոռնալ, որ անոնք փոշիի բոյնի կրնան վերածուիլ: Հետեւաբար պէտք է զանոնք լուալ տաք ջուրով ու օճառով եւ սառցարանը պահել քանի մը ժամ՝ աքարիենները չէզոքացնելու համար:

– Երեխային մահճակալին տակ ապրանք (խաղալիքի տուփեր, կօշիկի տուփեր եւ այլն...) չպահել՝ յաւելեալ փոշի չկուտակելու համար:

– Երեխային վերմակն ու բարձը թող ըլլան սենթեթիք նիւթ պատրաստուած, որպէսզի յաճախ լուացուին:

– Շարքաթական դրութեամբ պէտք է տաք ջուրով եւ օճառով լուալ երեխային սաւանդէնը:

Տան Բոյսերուն Բարերար Ազդեցութիւնը

Ուսումնասիրություններու համաձայն, սենեկային բոյսերը բարերար ազդեցութիւն ունին մեր առողջութեան եւ ջղային դրութեան վրայ: Անոնց ներկայութիւնը եւ խնամքը խթան կը հանդիսանան որոշ հիւանդութիւններէ հեռու մնալու. արդարեւ, անոնք կը վերականգնեն

ջղային համակարգի ներդաշնակությունը, կը հանգստացնեն, կը մեղմացնեն ընկճախտը եւ կը բարձրացնեն տրամադրությունը:

Ոչ միայն տուներու, այլ նաեւ գրասենեակներու մէջ բոյսերը կը ստեղծեն որոշ յարմարաւէտութիւն եւ կը վերացնեն աշխատանքային միօրինակությունը:

Գիտէ՞ք, թե...

- Բոյսերը կը ստեղծեն ուրախ եւ պայծառ մթնոլորտ եւ կը բարելաւեն թթուածինի որակը:
- Բոյսերը դրական ազդեցություն կը գործեն ստեղծագործական միտքին վրայ եւ կը նպաստեն



կեդրոնացումին:

- Այն հիւանդանոցները, ուր կան կանաչ գոտիներ, հիւանդները աւելի արագ կ'ապաքինին, քան՝ այն հիւանդները, որոնց հիւանդանոցներուն մէջ բոյսեր չկան:
- Բոյսերը զարմանալիօրէն կը կլանեն աւելորդ ձայները, վտանգաւոր նիւթերը եւ կը պահպանեն խոնաւութեան մակարդակը:
- Գրասենեակներուն մէջ բոյսերը կը բարձրացնեն աշխատանքին արտադրողականությունը:
- Բոյսերը օդը կը մաքրեն փոշիէն եւ աղտերէն:
- Բոյսերը ունին զովացնելու յատկություն: